



4. juni 2026

UPA2026/123

**Nuugaatsiaq Illorsuillu siunissaat pillugu apeqquteqaat aallaavingalugu oqallisissiatut siunnersuut.**  
(Inatsisartunut ilaasorta, Aqqalu C. Jerimiassen, Atassut)

Aallarniutigalugu Siumumit oqaatigissagatsigu siunnersuuteqartup Nuugaatsiaq ilanngullugu siunissaa oqallisissiarimmagu, uanili pingaarnertut Illorsuit siunissaa pillugu oqallisissiami oqalliseqataaffigissuarput.

Illorsuarmit Nuugaatsiarmit 2017-mi qimarngussorneqarmata siunertaasuarsimavoq sumiiffigisamut uteqqittoqarsinnaanera nalilersortuarneqassasoq, tamassumali pitinnagu pisortatigoortumik oqaatigineqarluni Upalungaarsimanermit Ataatsimiititaliarsuarmit Namminersornerullutik Oqartussanit, Politiinit Sakkutuunillu inuttaqartinneqartup GEUS peqatigalugu minnerunngitsumillu norskit NGU ujarassiornermit ilisimatusarfia peqatigalugu nlilersuinerit ingerlanneqaqqaartuassasut.

Misissueqqissaarsimanerit arlariit naammassisimalerput aammalu aningaasarpasuit misissueqqissaarnermit atorneqarsimalerput, kingullertigullu Upalungaarsimanermit Ataatsimiititaliarsuup 2023-mi nalunaarutigaa nakkutiginninnermit aamma kalerrisaarinnermit aaqqiissutissaliornermit 9 mill koruunik aningaasaliinikkut kalerrisaarummik tulluusaaneq toqqissisimanarnerusoq sulissutiginiarneqartoq, tamannalu 2005-mi naammassissagatinneqarnikuuvoq ukiuni marlunni sulinissaat naatsorsuutigineqarmat. Tamanna Naalakkersuisunit nalunaarutigineqarpoq martsip 2-ni 2023.

Periarfissaq atorlugu suliaq naammassisimassamat Naalakkersuisunut qanoq inassuteqaateqartoqarlunilu tulluusaalluni sulissutiginiakkat aaqqiissuussaliorniarneq inerneqarnersoq Siumumiit apeqqutigaarput?

Illorsuit alianaatsorsuuginnangilaq, kisiannili aalisagaqarfissuuvoq qaleralersorsuullunilu piniarfigissorsuuvoq. Nalaatsornerinnaangilaq ukiorpassuarni inunnit nuannarineqarlunilu nunagineqarmat. Inuussutissarsiorinikkut ima periarfissarissaartigaat nunaqarfiuvoq imminut napatilluartuusimasoq, pisortat ikiorsiissutaasa agguaqatigiiffigisaanni allattorsimaffitsigut Illorsuarmit atuinikinnerpaanut inissimasuarsimapput, qaleraeqarfiissuugamik ingerlalluarsimapput aammalumi ulloq manna tikillugu atukkamikkut pitsaanagerusumik inissisimalersimanngitsutut taaneqarsinnaavoq aaliasarfik piniarfillu inuulluarfiunerusoq nunagiunnaaramikku. Paasinarluinnartumik angerlarsertoqarpoq minnerunngitsumillu paasinnilluarluta Naalakkersuisut sukannersumik kaammattorpavut misissueqqissaarnerit unikaallatsinngillu aasarlugit aammalu upalungaarsimanikkut kalerrisaaringasuarnissatigullu aaqqiissutissat sulissutigineqartut pingaartillugit sulissutigissagaat.

Inuit akissutissarsisaqarput, innuttaasut akissutissarsisariaqarput, nunaqqatit neriuuteqartariaqarput inuiaqatigiisugullu salliutilluta pingaartilluta sullinneqartariaqarput.



Upalungaarsimaniarnermut ataatsimiisitaliarsuup nalilernikuuaa, GEUS-ip qaqqat sisoorsinnaanerannik misissuisimanagerata Kalaallit Nunaanni ilungersunartumik qaqqani sisoortoqarsinnaanerannik misissuinerup" inaarutaasumik nalunaaruteqarnerminni ataatsimut isigalugu aarlerinaatinut naliliinerit allanngortinngikkai. Oqaatigineqarpoq kingorna suliniutigineqartut ingerlaqqissasut aamma upalungaarsimaneq pillugu suliamut ilisimasat pillugit naliliinerit, siusinnerusukkut Naalakkersuisunit tusaatissatut tiguneqarsimasut, aalajangiusimaneqaannarnissaat Upalungaarsimanagermut ataatsimiititaliarsuup taamaammat innersuussutigigaa. Illorsuarnut Karrat kangerluanni sumiiffiit navianaateqarfiusut allat pillugit innersuussutit pioreersut aalajangiusimaannarneqarnissaat tamatuma kinguneraa. Alapernaarsuinermut atortut tassaapput assiliiviit pingasut qaqqap qaavata iloqisseriartorneranut malinnaasussat, nunap sajuppillattarneranut uuttuut silasiornikkullu uuttortaatit. Alapernaarsuinermit atortut Umiammakku Qaqqaaani sivinganerit qajannaatillit 2017-imi sisoortoqarfiup eqqaaniittuut "Karrat 1", "Karrat 2" aamma "Karrat 3" allanngoriartornerat ataavartumik uuttortassagaat sulissutigineqarpoq. 2023-imi aasaanerani alapernaarsuinermut atortut amerlineqassasut siunniunneqarnikuuvoq attaveqaatitigullu atortut annertusaavigineqassasut oqaatigineqarluni. Alapernaarsuinermut atortut taaneqartunut assingusut Kangerluarsummi Kigarsimap kangiani qaqqap sivinganerannik qajannarsisumik uuttortasussat 2023-ip aasaanerani inissinneqarsimanissaat pilersaarutaanikuuvoq.

Piffissaavoq maannakku Illorsuit ammaqqinnissaanut suliaq naammassissallugu. Piffissaavoq misissuinerit kingullit inerniuliussaasariaqalernerit aammalu qaqqat sisooriaannaanerinsa inissisimanagerat allannguuteqangaatsiarsimasoq aallaavigalugu isummernerit nutaanerpaat qaqinnissai. Piffissaavoq Illorsuarmit akissutissarsinissaat aammalu piffissaavoq toqqissisimaneq anguniarlugu suliap kinguarsarnagu salliutillugu sulissutigineqartariaqarnera.

Qujanaq